

# 1 TIMOTEU

## Pablupa punta caq cartan

### Timoteupaq

Timoteoqa Pabluwanmi Diospa palabranta willapäcur jinantinpa puriyarqan. Timoteupa papänenqa carqan Diosman mana marcäcoqmi; peru mamänqa Diosman marcäcoqmi carqan. Mamänenqa israel nuna castam carqan.

Efeso marcachomi Pabluwan Timoteu alli unepa yachatsicur quedacuyarqan. Tsepitanam Pabloqa juc marcacunapana euquita pensarnin, Timoteuta nerqan tsecho quedecur yachatsicur siguinanpaq, tsenopa mas creyicoqcuna miracäyananpaq, y alli patsacashqa cayänanpaq. Tseno encarguecurnam “Prontunam cutiramushaq” nir, despidiquicur eucorqan. Tseno nicarpis Pabloqa cutinanpaq unemi demoramorqan. Tsemi Timoteuman cartacorqan llapan rurananpaq caqcunata yarpätsir. Que cartachopis Pablu Timoteuta nin mana alli yachatsicoqcunata cösa willapänanpaq. Jina willapan creyicoqcunata shumaq cuidar ordenman churar Efesocho cananpaqmi.

#### *Pablu Timoteuta saludanqan*

<sup>1</sup> Noqa Pablum, salbacoq Diospa, y marcäcur shuyaconqantsic Teyta Jesucristupa acrashqan apostolnin cä. <sup>2</sup> Tsemi, allapa cuyë Timoteu, que cartata qamman cartacamü. Qamqa imeca tsuri cuentam canqui Jesucristuman

marcäquiniquirecur. Y allapam munecü Dios Yayantsic y Jesucristuntsic alli queninwan y ancupäquininwan shumaq pasaquicho canequipaq yanapecushunequita.

*Mana alliyachatsiquicunapaq cäyitsiquicuna*

**3** Macedonia marcata eucurninmi, rogarraq Efeso pueblucho quedecur yachatsicunequipaq. Tsenollam cananpis roguecoq tsecho waquin nunacuna llutancunata yachatsicuyaptin michänequipaq. **4** Ama yachatsicuyätsuntsu mana caqtaqa Diospaq willapäcur, ni une castancuna imanopis cayanqanta. Tseno yachatsicuyaptinmi, Diosnintsicpa boluntaninman marcäcuyanqanta qonqaquicur liryaquillachona cacuyan, y manam yanapacuntsu Diosnintsicpa muneninta marcäquinintsicllawan musyanqantsicta.

**5** Peru Diosnintsicpa boluntanenqa queno canantsicpaqmi: alli shonquntsicwan jucnintsic jucnintsic cuyanacunapaqmi, alli consensantsicwan cawacunapaqmi, y alli caq yachatsiquicunaman rasonpa marcäcunapaqmi.

**6** Quecunata qonqecurmi, tse mana alli yachatsicoq nunacuna oqracashqa cuenta puriquicayán llutanta parlacurnin. **7** Pecunam Moises esribishqan leycunata yachatsicur, yachaq tucuyan; peru melayapa yachatsicurpis, manam parlayanqan ni ima ninan canqantapis musyayantsu.

**8** Musyantsicmi Moisespa leynincuna allapa alli canqanta, peru tsepaqqa allipam yachatsishwan. **9-10** Tse leyqa manam alli

ruraqcunata jusganqatsu; sinoqa jusganqa mana cäsucoqcunatam, mana alli ruraq jutsasapacunatam, Diosta ni yachatsiquininta mana cäsucoqcunatam, papäninta, mamäninta, y nuna mayinta wanutsicoqcunatam, jucwan jucwan pununacoqcunatam, ollqu mayinwan pununacoqcunatam, eslabu\* cayänanpaq nunacunata ranticoqcunatam, ulicoqcunatam, ulicurcur nuna mayinta lebantaqcunatam y Diosnintsicpa rasonpa caq yachatsiquinincunapa contran caqcunatam jusganqa. <sup>11</sup> Tse rasonpa caq yachatsiquicunataqa musyarintsic allapa puedeq benditu Diospa alli willaquininchomi. Tse willaqluita willacunäpaqmi Dios marcäcamashqa.

### *Diosnintsicpa ancupäquininpaq cushiquicuna*

<sup>12</sup> “Grasias” niquicullämi Teytantsic Jesucristuta. Pemi balorta qomar, cumplidu nunatanopis acramashqa peta sirwinäpaq. <sup>13</sup> Puntata pepaq mana allicunata parlar contran quecaptipis, y qatiraqnincunata asharnin ushacätsinäpaq qaticachëcaptipis, Diosmi ancupämashqa; porqui tsepenqa manaraq peman creyicurmi, musyarqätsu ima ruranqätapis. <sup>14</sup> Tseno quecaptipis, Diosnintsicmi alli queninwan ancupëcamar cäyitsimarqan peman marcäcunäpaq, y Jesucristu cuyacoq canqanno cuyacoq canäpaq.

---

\* **1:9-10** Canan tiempu sirwipäcoqcuna manam iwalayantsu une tiempu eslabucunawan. Tse tiempuchoqa ranticuyarqan y rantiyarqanmi nunacunata eslabu cayänanpaq.

**15** Jesucristum que patsaman shamorqan jutsasapacunata salbananpaq. Tse jutsasapacunapitapis mas peormi carqä. Queqa rasonpa caqmi, y llapequim tsetaqa creiyänequi. **16** Tseno jutsayoq quecaptipis, Teytantsic Jesucristu manam castigamarqantsu. Mas bienmi ancupëcamarqan Jesucristu allapa pasensiacoq canqanta nunacuna musyayänanpaq. Tseta cuentata qocurinam, waquin nunacunapis peman creyicuyanqa wiñepa wiñenin cawayänanpaq. **17** ¡Tserecur allapa respetuwan imecamayaqpis alabecushun wiñepa wiñenin cawacoq, mana ricacoq, japallan manda-coq Teyta Diosta! ¡Tseno catsun!

**18-19** Cuyë Timoteu, noqapaqqqa tsuri cuentam qam canqui. Yarpë qamtapis willapäcoq canequipaq Diosnintsicpa profetancuna acrayäshurniqui niyäshonqeiquita. Tsenollam noqapis queno neq: Diosnintsicman alli marcäcur, alli consensiequiwan ima eca pasashuptiquipis, listu quequë Diospaq willacur siguinequipaq. Waquin creyicoqcunaqa mana alli consensiayoq carmi, Diosman marcäquinincunatapis pasepa ushacäratsiyashqa. **20** Himeneutam y Alejandrutam tseno pasashqa. Tsemi diablupa munenincho cacuyänanpaq jaqirerqö, tsenopa itsa yachacuyanqa Diosnintsicpa contran mana imatapis parlayänanpaq.

## 2

### *Mañacunapaq yachatsiquicuna*

**1** Canan quecunatam neq: Rogacushun, mañacushun, suplicacushun y grasics nïcushun

Diosnintsicta llapan nunapaq. <sup>2</sup> Mañacushun jinantin nasioncho gobiernucunapaq y autoridacunapaq. Tsenopam alli pasaquicho imapaqpis mana yarpacachashpa, Diosnintsicta respetarnin pe munashqanno cawacushun. <sup>3</sup> Tseno mañaqueqa allapa allim; y salbacoq Diosnintscpis cushicunmi. <sup>4</sup> Pëqa munan llapan nunacuna salbacuyänantam, y rasonpa caq yachatsiquicunata musyayänantam. <sup>5</sup> Jucllellam Diosnintscqa, y jucllellam Diosnintscwan amishtatsicoq nunaqa. Tse nunaqa Teytantsic Jesucristum. <sup>6</sup> Pemi yawarninwan rescatamarqantsic llapantsic mana castigashqa canantsicpaq. Que willaquitam Diosnintscic musyaratsimarqantsic dispuñishqan tiempuncho. <sup>7</sup> Diosmi apostolnин canäpaq acramar, cachamarqan mana israel caq nunacunatapis yachatsinäpaq. Tsenopam Diosman marcäcur rasonpa caqta musyayanqa. Nenqäqa rasonpam; manam ulicütsu.

*Olluqucuna y warmicuna imano portacuyänanpaq*

<sup>8</sup> Tsemi munä jinantincho llapan nunacuna limpiu shonquncunawan, maquincunata pallarircur, mana piñashpa y mana liryacushpa Diosman mañacuyänanta. <sup>9</sup> Tsenolla warmicunapis shumaq besticuyätsun, sensillullata y normallata. Naqtsacuyätsun, peru ama moñapäcur. Tuqui nicachaq perlaswanqa ni qoriwanqa altsapäcuyätsuntsu; ni ropacunatapis allapa chaniyoqtaqa yacacuyätsuntsu. <sup>10</sup> Antis Diosnintsicta sirweq

warmicunaqa allicunallatana rureta tīrayätsun.  
**11** Y inglsiachonäqa ama bullacuyätsuntsu, antis shumaq cäsucur wiyacuyätsun willapäcoqcunata.  
**12** Manam munätsu warmicuna nunacunata inglisiachoqa yachatsinanta, ni ollqucunata mandecachäyänanta. Mas bien shumaq wiyacuyätsun. **13** Tseno neq: Adanta camarirraq Evata Diosnintsic camashqa captinmi.  
**14** Manam Adantatsu diablu engañarqan, sinoqa warmin Evatam. Tsemi engañuman ishquir jutsallicurerqan. **15** Imano carpis, warmicunaqa salbacuyanqa wawancunata alli wätarmi, shumaq portacurmi, Diosman alli marcäcurmi, alli cuyaquiyoq carmi y Diosnintsic munashqanno cawacurmi.

### 3

#### *Inglisiacho mandacoqcuna imano portacuyännapaq*

**1** Pipis inglsiacho mandacoq queta munarqa, allitam yarpecushqa. Tseqa allinatam jina.  
**2** Tsemi inglsiacho mandacoqqa canman: nunacunapita mana penqapashqa, juc warmipa qowanlla, cabal nuna, alli yarpeninwan shumaq portacoq y nunacunapita respetashqa. Wayinman pipis posadacoq chaptinnäqa, chasquinanpaq listum quecanan, y alli yachatsicoqmi canman. **3** Manam machacoqtsu canman ni pelya asheqtsu; sinoqa canman juclaya qollmi nunam, shumaq pasaquicho cacoqmi y qellepaq mana locuyaqmi. **4** Wayincho caqcunatapis allapa shumaq manijaqmi canman, y tsurincunapis respetacur cäsucoqmi cayanman.

<sup>5</sup> Porqui pipis wayincho mana mandaquita yachecar ¿Imanoparaq Diosman creyicoqcunata cuidanman! <sup>6</sup> Nï Diosnintsicman tsellaraq entregacushqa nunaqa manam inglisiacho mandacoq queta puedintsu. Tseno carqa, capaschi orgulloso ticracurenqa. Tsemi orgulloso queninwan diabluno castigashqa canqa. <sup>7</sup> Diosman mana entregacushqa nunacunachopis jina alli rurenintam ricatsicunman, tsenopa llutancunata pepaq mana parlayänanpaq, y toqlaman ishqueq cuenta diablupa muneninman mana ishquinanpaq.

*Inglisiacho                    diaconocuna                    imanopis  
portacuyänanpaq*

<sup>8</sup> Tsenolla jina inglisiacho diacono nunacunapis cabal cayätsun. Ama cayätsuntsu badulaqueqa, ni machacoqqa, ni qellepaq locuyaqqa. <sup>9</sup> Diosnintsic musyatimashqantsic rasonpa yachatsiquicunacho alli tsaracoq y alli consensiayoq cayätsun. <sup>10</sup> Puntataraq ricapäriqui imano cayanqantapis. Tsenam llapancho alli portacuyaptenqa, sirwicoq diacono cayänanpaq churarinqui. <sup>11</sup> Tsenolla warmincunapis\* cayätsun respetosa, mana wasa rima, cabal y imachopis cumplidu. <sup>12</sup> Diacono nunacunaqa juc warmipa qowanlla cayätsun. Wayincho caqcunata alli manijaq y tsurincunatapis alli ejemplaq cayätsun. <sup>13</sup> Diacono nunacunaqa, carguncunacho allita rurarqa,

---

\* **3:11** Waquin yachaq nunacuna pensan que palabra ninan Dios sirweq warmicunapaq, mana diaconopa warmincunapaq.

nunacunapita respetashqam tictarriyan. Y mana mantsacushpanam Teyta Jesucristuman marcäcur cacuyanqa.

### *Jesucristupaq yachatsiquicuna*

<sup>14-15</sup> Prontum shamita munecä, peru quecunatam escribirimü manaraq shamuptipis, Diosman creyicoq caqqa imanopis portacuyänequita musyayänequipaq. Qamcunaqa cawaq Diosman creyicoqcuna carmi, mana cuyoq perqanona carnin, rasonpa caq yachatsiquicunata defendir quecayanqui. <sup>16</sup> Imano shumaqmi que alli willaquininta Diosnintsic musyaratsimanqantsic: Teyta Jesucristum que patsacho noqantsicno yuricorqan.

Santu Espiritum musyatsimargantsic rasonpa caqlłata parlacoq canqanta.

Anjelcunam ricayarqan.

Mecho tsechopis pepaq willacuyaptinmi, nunacuna peman creyicuyarqan, y gloriamanmi cuticorqan.

## 4

### *Diosnintsicman marcäquinincunapita qepaman cuticoqcuna*

<sup>1</sup> Santu Espiritum cäyitsimargantsic que tiempucunacho waquin creyicoqcuna Diosman marcäquicayanqanta jaqiricur supëpa muneninta yachatsicur engañacoqcunata qaticurcuyänanpaq cashqanta. <sup>2</sup> Tse engañacoqcunaqa, alli tucoq quenincunawan ulicurcur yachatsiquicarpis, consensiancunacho manam ni ima qocuyantsu.

<sup>3</sup> Pecunam michäyan ollqucuna warmiyoq

cayänanta, y warmicuna qowayoq cayänanta. Tsenollam michäyan ima miquicunata micucuyänantapis. ¡Manam tsenotsu! Diosnintsic camashqan miqueqa llapanpis allim. Tsemi Diosnintsicman creyicoqcunaqa palabranta musyarnin, ima miquitapis micucuyanman peta "Grasiasllä" nicur. <sup>4</sup> Diosnintsic camashqanqa ima miquipis allim. Tsemi Teyta Diosta "Grasiasllä" nicurir, ima miquicunatapis micucushwan; <sup>5</sup> porqui Diosnintsicpa palabranta cäyicur, peta mañacushqaqa, ima miquipis limpium.

<sup>6</sup> Que nirenqaqta wauqintsiccunata y panintsiccunata cashqantanolla yachatsi. Tseno yachatsicorqa, Teyta Jesucristupa alli sirweqninmi canqui marcäquiniquicho alli patsacashqana car, y wiyanqe qui rasonpa caq yachatsiquicunata yachacushqana car.

<sup>7</sup> Ama cäsitsu mana imapaqpis sirweq une une yachatsiquicunataqa; sinoqa Dios munanqanno cawacur yachaquita třë.

<sup>8</sup> Imallapis fisica ruranqantsicqa cawe bidantsicpaq allim; peru Dios munanqanno cawaquita yachaconqantsicran mas alleqa, wac bidapaq y que bidapaqpis. <sup>9</sup> Que nenqaqmí rasonpa caq willaqueqa, y llapancunam chasquir creyiyanman. <sup>10</sup> Tsemi imecata sufrircuryanpis Diosnintsicpaq willapäcuntsic; porqui noqantsicqa cawecaq Diosnintsicmanmi marcäcuntsic. Pemi llapantsicpa Salbamaqnintsic, peman creyicushqanäqa.

<sup>11</sup> Quecunatam mandacunequi y yachat-

sicunequi. <sup>12</sup> Ama pipis despresyashitsu jobin canquequirecur; antis Diosnintsicman creyicoqcuna qampita yachacuyätsun shumaq parlaquiniquipita, alli portaquiniquipita, cuyacoq queniquipita, Diosnintsicman alli marcäcoq canquequipita y juclaya shonqu queniquipita. <sup>13</sup> Chämonqäyaq, creyicoqcunata Diospa palabrantा leyipar, yachatsicur y willapäcur cacurëqué. <sup>14</sup> Paqtataq qonqaquicunquiman Teyta Dios yacheniqui qoshurniqui acrashonqeiquita. Tse yachetaqa bendisiyäshurniqui inglesiacho mandacoqcuna maquinta qamman churayämuptinmi chasquirerqeiqui.

<sup>15</sup> Que yachatsenqaqcunata shonqiquicho yarparar rurë. Tsenopam llapancuna cuentata qocuyanqa waran waran mas cabal alli nuna ticraquicanqeiquita. <sup>16</sup> Cuidaqui quiquipi, y allita yachatsiqui. Tsecunata imepis rurarnenqa, mana allicunapitam salbacunqui, y wiayäshoqniqunapis salbacuyanqam.

## 5

*Diosnintsicman creyicoqcunawan imano portacunapaq*

<sup>1</sup> Auquincunata ama qaparipa willapëtsu; sinoqa imeca papäniquitano willapëqui. Jobincunatanäqa riquequi imeca wauqiquitano. <sup>2</sup> Chacwancunatanäqa riquequi imeca mamequitano, y shipashcunatapis imeca paniquitano limpiu shonqiquwan respetacunqui.

<sup>3</sup> Mana pininnaqpis biudacunatanäqa yanapequi. <sup>4</sup> Peru sitsun wawancuna o willcancuna

caponqa, pecuna tse biudata yanapayätsun. Tsenopam Diosta respetacurnenqa, puntata yachacuyanqa wayincho castancunata ancupar yanapeta. Tsenollam papänincunatanäqa cuyayanman wamra quenincunacho pecunatapis cuyayashqannolla. Tseno rurashqaqa allapa allim Diospaq. <sup>5</sup> Rasonpa mana pininnaqpis biudaqa Diosllamanmi marcäcun. Tsemi paqasta junaqta Diosta rogacur mañacur cacun. <sup>6</sup> Peru lluta puricoq biudaqa quiquinpa munenincunata ruraconqanrecurmí, cawecarpis wanushqa cuenta quecan. <sup>7</sup> Que nenqaqcunata rurayänanpaq Diosman creyicoqcunata willapë nunacunapita mana penqapashqa cayänanpaq. <sup>8</sup> Sitsun pipis castancho biudacunata yarpacachar yanapanqatsu, Diosman marcäconqanpis manam imapaqpis sirwintsu, y Diosman mana creyicoqcunapitapis mas mana alli ruraqmi cayan.

<sup>9-10</sup> Joqta chunca (60) watayoqpita witsepa caq biudacunapa jutinlla, apuntiquicho catsun yanapayänequipaq, y juc nunapa warminlla cashqa caqcuna, alli rurenincunarecur reqishqa caqcuna, wamrancunata alli ejemplashqa caqcuna, wayiman posadacoqcunata mana ajayashpa chasqueq caqcuna, Diosman creyicoqcunata qollmi shonquncunawan sirwishqa caqcuna, sufrimentucunacho jipacoqcunata yanapashqa caqcuna y waquin imapis alli rurecuna cumpleq caqcunapa jutinlla.

<sup>11</sup> Peru apuntiquiman ama churëtsu shipashlla biudacunapa jutintaqa. Capas quiquinca munenin acusaptin, Jesucristullata sirwiyananpaq

äniyanqanta qonqaquicurnin, yape qowäquita munayanqa. <sup>12</sup> Tsenam änicuyashqanta\* mana cumplirnин, culpayoq tictarriyanqa. <sup>13</sup> Manam tsepis tsellatsu. Wayin wayin puricoqmi cayanqa, y ni ima ruraquitapis manam munayanqatsu. Tsewanpis manam conformayantsu; sinoqa wasa rimam tumacuriyanqa, imecamanpis mana allimanmi meticuyanqa mana combieneqcunata parlar. <sup>14</sup> Tsemi munä shipashlla biudacunaqa yape casacuyänanta, wamrancuna cayäpunanta, wayincunacho alli mamä cayänanta. Tseno cayaptenqa, chiqueqnincuna mananam pecunapaq rimayanqanatsu. <sup>15</sup> Porqui waquin shipashlla biudacunaqa Diosnintsicman manana marcäcurmi, diablu munashqannonca cawaquicayan.

<sup>16</sup> Diosnintsicman creyicoqcunaqa quiquiruncunam yanapanan castancho caq biudacunata. Tsenopam Diosman marcäcoqcuna mana cuentatsaconqanatsu tse biudacunapaq. Antis mana piyoqpis biudacunallapaqnam yarpacachäyanqa. <sup>17</sup> Inglisiacho mandacoqcuna alli mandacoq cayaptenqa, allapa respetarnin paguecuyë. Diosnintsicpaq willapäcur yachatsicoqcunatanäqa masraq „prefericuyë“. <sup>18</sup> Tseno cananpaqmi Diosnintsicpa palabranpis queno escribirëcan: “Eracho trigu jaloq torupa shiminman ama churayëtsu jäquimata.”\* Jina quenopis nicanmi: “Uryapucoqcunatapis

---

\* **5:12** Biblia estudiaqcunam atscaq queno niyan: “Capasmi que biudacunaqa Teyta Diosta änishqa cayarqan yape manana casacuyänanpaq, sinoqa inglisiacho yanapacoq cayänanllapaqna.

\* **5:18** Dt 25.4

pagayänan combieninmi”\* nishpa.

<sup>19</sup> Ama cäsitsu inglisiacho mandacoqcunapaq llutanta niyaptin, mana ishcaq o quimaq testigu pecunapa contran parlayaptenqa.

<sup>20</sup> Jutsata rurar sigueqcunataqa llapan creyicoqcuna janancho piñapequï, wiyaq caqcuna penqacur mantsacuyänanpaq.

<sup>21</sup> Diospa, Teyta Jesucristupa y acrashqan anjelcunapa jutinchomi qamta mandaq, mana pimanpis qaqärishpa, ni pitapis mana adulashpa tse nenqaqcunata ruranequipa. <sup>22</sup> Ama pimanpis maquiquita churëtsu mandacoq cananpaq bendisirnin, mana alli pensarishpaqa, tse mandacoqcunapa jutsancunapita culpayoq mana canequipa. Limpiu shonqu queta třire.

<sup>23</sup> Pacha nanellacho canquequircur y qeshyapäconquequircur, yacullataqa ama upïtsu; sinoqa cananpita witsepa upi binutapis ichicllataqa.

<sup>24</sup> Nenqaqno yö, ama apuradoqa pitapis acrétsu mandacoq cayänanpaq, porqui waquin nunacunapa jutsancunaqa tse öram musyacärin, pecuna manaraq jusgashqa cayaptin. Peru waquin nunacunapa jutsancunaqa musyacärin tsepitaran. <sup>25</sup> Tsenollam jina waquin nunacunapa alli rurenincunapis musyacärin tse öra, peru mana musyatsicushpa waquin alli rurenincunaqa musyacärin tsepitaran.

## 6

<sup>1</sup> Pipis Jesucristuman marcäcoq esclabu carnenqa, patronnincunata allapa respetuwan ima-

---

\* **5:18** Lv 19.13

chopis cäsuyätsun. Tsenopam Diosnintsicpa y yachatsiquinincunapa contran nunacuna manana parlayanqanatsu. <sup>2</sup> Sitsun meqan esclabupa patronninpis Teyta Jesusman marcäcoq canqa, ama tse patronninpita burlacutsuntsu “¡Que patronniqa Diosman creyicoq mayillataql!” nir. Antis Diosman creyicoq cuyashqa wauqincuna canqan-recur, mas allipa sirwiyätsun.

*Ricu queqa Diosnintsicwan alli cawaquimi*

Que willapanqaqcunata shumaq yachatsicunqui. <sup>3-4</sup> Sitsun meqan nunapis Dios munashqanno cawacunapaq caqta Teyta Jesucristupa yachatsiquininta juclayapa yachatsiconqa, tse yachatsicoqqa orgulloso imapis mana musyaqmi. Tse shimincunarecurmi bullaqillacho y liryaquillacho cacuyan. Y tse parlashqancunaqa imeca qeshyanomi apamun, chiquinaquita, liryaquita, ashanaquita, desconfianaquita. <sup>5</sup> Tse mana alli yachatsicoqcunaqa mana cäyinacoq pura carmi, Teyta Jesucristupa yachatsiquininta qonqecur, imepis liryaquillacho cacuyan. Y Dios munashqanno cawanapaq yachatsiquicunatapis, negosiuta ruracuyänanllapaqmi munayan. Tseno nunacunawanqa ama juntacuyëtsu. <sup>6</sup> Noqantsicqa musyantsicmi Dios munashqanno cawaqueqa biennintsicpaq canqanta, peru tsepaqqa capamanqantsicllawanmi conformi cawacushwan. <sup>7</sup> Manam que bidaman shamur imatapis apamorqantsictsu; wanucurpis manam ni imata apashuntsu. <sup>8</sup> Tsemi micunantsicpaq y yacacunantsicpaq capamashqaqa, cushi cushi cawacushun. <sup>9</sup> Peru capoqyoq ricu

queta munaqcunaqa rasllam ishqiriyana  
diablupa muneninman y quiquinunapa  
mana alli munenincunaman. Tseno carmi,  
quiquinuncata malnincuna ashiyan, y  
almancunata infiernuman pushaquicayan.  
**10** Porqui allapa qelle cuyepitam llapan mana  
alli rurecuna yurin. Y waquin nunacunam  
qellepaq codisiosu car, marcäquinincunapita  
waqtsacäcuriyashqa. Tsenopam quiquinuncata  
llutepa sufrimientuncuna ashiyashqa.

### *Marcäquiniquicho allipa tsaraqui*

**11** Peru qamqa, Diospa nunan canqueuirecur  
que mana alli rurecunapita witicuriquï. Mas  
bien tïrë alli ruraq queta, Dios sirweq queta,  
cuyaquiyooq queta, marcäquiniquicho tsaracoq  
queta y ancupäcoq queta. **12** Imecata sufrirninpis,  
marcäquiniquicho, y wiñe caweniquicho alli tsara-  
cunqui. Porqui wiñe caweyooq canequipaqmi  
Dios acrashorqeque. Diosman marcäcunequipaq  
caqtaqa, quiquirim willacorqeque atscaq  
nunacunapa nopancho quecar. **13-14** Timoteu,  
imecapis cawatseq Diospa jutinchomi y  
Poncio Pilatupa nopancho alli ruraq queninta  
ricatsicoq Jesucristupa jutinchomi mandaq:  
Que cartacho nenqaqcunata mana qonqashpa  
cumplinqui mana rimashqa canequipaq,  
Teyta Jesucristu cutimonqanyaq. **15** Teyta  
Jesucristum cutimonqa Dios dispunishqan  
tiempu chäramuptin, porqui pellam benditu  
imecachopis puedeq Diosqa, mandacoqcunapa  
y autoridacunapa mandacoqninpis. **16** Diosllam  
imepitapis y imeyaqpis cawaqqa, y yachan mana

witiquipaqno actsichomi. Petaqa manam ni meqan nunapis ricashqatsu, y manam riqueta puedintsu. ¡Peta alabecushun, y puedeq quenin imecamayaqpis quecutsun! Tseno catsun.

<sup>17</sup> Que patsacho ricucunata willapéqui, mana orgulloso cayänanpaq, ni imapis cayäpoqnincunallaman mana marcäcuyänanpaq; sinoqa marcäcuyätsun Diosman. Capoqyoq queqa ushacäreqlam. Pemi qomantsic imecatapis atsca atscata probechuntsicpaq.

<sup>18</sup> Willapë allicunallata rurar nuna mayincunata imecachopis yanapayänanpaq. Ama micha cayätsuntsu; sinoqa alli shonquncunawan nuna mayincunata yanapecuyätsun. <sup>19</sup> Tseno rurarqa, Diosnintsiccho rasonpa caq fortunatam quiquinuncunapaq ashicayan, y wiñe cawetam tariyanqa.

### *Cartapa ushanan*

<sup>20</sup> Cuyë Timoteu, que mandanqaqcunata ¡Ama yö qonqecunquitsu! Ama cäsunquitsu waquincuna mana imapaqpis sirweq llutan yachatsicoqcunata. Pecunaqa allapa yachaq tucurpis, manam Diospaqqa ni imata musyayantsu. <sup>21</sup> Tseno yachaq tucurmi, waquincunaqa raquicacuriyashqa Diosman marcäquinincunapita. Teyta Diosnintsic allapa alli queninwan qamcunata yanapecuyäshü.

**Teyta Diospa Mushoq Testamentun  
New Testament in Quechua, Huaylas Ancash  
(PE:qwh:Quechua, Huaylas Ancash)**

copyright © 2008 Wycliffe Bible Translators, Inc.

Language: Quechua, Huaylas Ancash

Translation by: Wycliffe Bible Translators, Inc.

Quechua, Huaylas Ancash [qwh], Peru

**Copyright Information**

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Quechua, Huaylas Ancash

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022  
d9ddd18-d974-546d-843a-95397527968f